

**Dununya damina kitabu**  
***Ala ka dununya dan cogo min na***

**1** <sup>1</sup>Fofofofo, Ala ka sankolo dan, ka dugukolo dan. <sup>2</sup>Dugukolo tun ma laben fofo; a lakolonba tun lo. Ji dunba le tun be yi; a yoro bee tun ye dibi le ye. Nka Ala Nin tun be lamagara jiw kunna.

<sup>3</sup>Ala ko: «Yeelen ye bo!» Yeelen ka bo. <sup>4</sup>Ala k'a ye ko yeelen ka nyi. A ka yeelen ni dibi faran ka o bo nyogon na. <sup>5</sup>A ka yeelen wele ko Tere, ka dibi wele ko Su. Ayiwa su kora ka o dugu gbe; o kera lon fofo ye.

<sup>6</sup>O ko, Ala ko tuun ko: «Furance do ye ke jiw ce ma, ka jiw taran fla ye ka o bo nyogon na. <sup>7</sup>Ala ka o furance ke. Ji minw be san fe, ani ji minw be dugu ma, a ka olugu faran ka o bo nyogon na, ka furance ke o ce ma. Ala ka a fo cogo min, a kera ten. <sup>8</sup>Ala ka o furance wele ko Sankolo. Ayiwa su kora ka o dugu gbe; o kera lon flanan ye.

<sup>9</sup>O ko, Ala ko tuun ko: «Ji minw be sankolo jukoro, olugu bee ye lajen yoro kelen na; yoro to ye ke yoro jalan ye.» Ala k'a fo cogo min, a kera ten. <sup>10</sup>Ala ka yoro jalan wele ko Dugukolo; jiw bee lajenna yoro min na, a ka o wele ko Kogoji. Ala k'a ye ko o ka nyi.

<sup>11</sup>Ayiwa, Ala ko tuun ko binw ye falen dugukolo kan, ka o kisew ke o ra; ko yiri dentaw fana ye wuri, ka den ka kanya ni o suguyaw ye, kisew be ke minw denw na, walama kolo. Ala ka a fo cogo min, a kera ten. <sup>12</sup>Dugukolo ka binw bo ka o kisew ke o ra ka kanya ni o suguyaw ye. Yiriw fana wurira, ka den, ka o kisew, walama o kolow ke o denw na, ka kanya ni o suguyaw ye. Ala ka a ye ko o ka nyi. <sup>13</sup>Ayiwa su kora ka o dugu gbe. O kera lon sabanan ye.

<sup>14</sup>Ala ko tuun ko fen minw be yeelen bo, olugu ye ke sankolo ra, ka tere ni su faranfasi ka o bo nyogon na. O ye ke tagamasiyen ye ka wagatiw yira, ka lonw yira, ani ka sanw yira. <sup>15</sup>O fenw ye ke sankolo kono, ka yeelen bo dugukolo kan. Ayiwa Ala ka a fo cogo min, a kera ten.

<sup>16</sup>Ala ka yeelenbonan belebele fla ke. A bee ra belebeleba, a ka o sigi terefewagati kunna; ka fitini sigi sufewagati kunna. A ka lolow fana ke. <sup>17</sup>Ala ka o fenw bla sankolo ra, janko o ye yeelen bo dugukolo kan. <sup>18</sup>A ka kelen sigi terefewagati kunna, ka kelen sigi

sufewagati kunna, janko o ye keɛ ni dibi faran ka bo nyogon na. Ala ka a ye ko o ka nyi. <sup>19</sup> Su kora, ka o dugu gbɛ. O kera lon naaninan ye.

<sup>20</sup> Ayiwa Ala ko tuun ko: «Fennyanaman dow ye ke jiw ra, ka caya. Konow fana ye wuri san ni dugu cɛ.»

<sup>21</sup> Ala ka jɛgɛ baw dan, ani jirafen nyanaman tow bɛɛ; o fenw bɛɛ kera ji ra caman, ka kanya ni o suguyaw ye. Ala ka konow fana dan, ka kanya ni o suguyaw ye. A ka a ye ko o ka nyi. <sup>22</sup> Ala neɛmara o ye, ko o ye woro, ka caya ka kogojw fa. A ko konow fana ye caya dugukolo kan. <sup>23</sup> Ayiwa su kora, ka o dugu gbɛ. O kera lon loorunan ye.

<sup>24</sup> Ala ko tuun ko fennyanamanw ye ke dugukolo kan ka kanya ni o suguyaw ye: beganw, ani kongosogow, ani fen minw be fofɔ, o bɛɛ ni o suguya. Ala k'a fɔ cogo min, a kera ten.

<sup>25</sup> Ala ka kongosogow bɛɛ dan, o bɛɛ ni o suguya, ka beganw dan, o bɛɛ ni o suguya, ani fen minw be fofɔ, o bɛɛ ni o suguya. Ala k'a ye ko o ka nyi.

<sup>26</sup> O bɛɛ ko, Ala ko: «Ayiwa, sisan, an ye mogɔ dan ka kanya ni an yere cogo ye, a ye bo an fɛ, janko ale ye ke jɛgɛw bɛɛ kunna, ka ke konow kunna, ka ke beganw ni kongosogow kunna, ka sigi dugukolo bɛɛ kunna, ani fennyanaman minw bɛɛ be dugukolo kan.»

<sup>27</sup> Ala ka mogɔ dan

ka kanya ni a yere cogo ye,

a k'a dan ka kanya ni ale Ala yere cogo ye.

A ka o dan cɛ ani muso

<sup>28</sup> Ala neɛmara o ye; a ko: «Aw ye denw caman soro, ka caya ka dugukolo yoro bɛɛ fa, ka aw ta fanga sigi dugukolo kan, ka ke jɛgɛw bɛɛ kunna, ani konow, ani fennyanaman o fennyanaman be dugukolo kan.»

<sup>29</sup> Ala ka a fɔ o ye tuun ko: «Bin o bin be falen dugukolo kan, ani a den, ani yiri o yiri be den, ka a kisew, walama a kolo ke a denw konɔ, ne be o bɛɛ di aw ma, o be ke aw baro ye. <sup>30</sup> Kongofenw bɛɛ, ani konow bɛɛ, ani fennyanaman o fennyanaman be dugukolo kan, o koro

ye ko fen o fen be nenekiri, ne be bin di olugu ma, ka o ke o ta baro ye.» Ayiwa, Ala k'a fo cogo min, a kera ten.

**2** <sup>1</sup> Ayiwa sankolo ni dugukolo ni o kononofenw bee danna ka ban o cogo le ra. <sup>2</sup> Ala banna a ta baara bee ra minke, a nenekirira a tere wolonflanan lon. <sup>3</sup> Ala ka tere wolonflanan bonya, ka a bo dan na lon tow ra; sabu o lon le ra, a nenekirira a ta baara bee ra.

### *Ala ka mogo dan cogo min na*

<sup>4</sup> Ayiwa wagati min Matigi Ala ka danni ke, sankolo ni dugukolo danna nin cogo le ra.

Ala ka sankolo ni dugukolo dan tuma min na,<sup>5</sup> kongoyiri si tun te dugukolo kan folo, bin si fana tun ma falen folo; sabu Matigi Ala tun ma sanji ben dugukolo kan folo, ani mogo si fana tun te yi folo ka dugukolo senɛ. <sup>6</sup> Bugun do le tun be bo dugukolo ra ka ke ji ye ka dugukolo yoro bee son.

<sup>7</sup> Matigi Ala ka dugukolo bogo ta ka mogo lalaga ni a ye. O ko, a ka nyanamanya nenekiri fiye ni a dafonyo ye k'a don mogo nunwo fe; mogo k'a ke mogo nyanaman ye.

### *Edeni jamana yiritu nyuman*

<sup>8</sup> O ko Matigi Ala ka yiritu nyuman do ke Edeni jamana ra, tereboyanfan fe, ka mogo bla o konɔ. <sup>9</sup> Matigi Ala ka yiri suguya bee falen dugukolo kan; yiri cenyumaw, minw den ka di; a ka nyanamanya yiri bla yiritu cemanɛ ra, ani yiri min b'a to mogo be konyuman ni kojugu lon k'a bo nyogon na.

<sup>10</sup> Ba do tun be woyo ka bo Edeni jamana ra. O ba ji le tun be woyo ka teme yiritu konɔ, o ko a be taran ka ke ba boro naani were ye. <sup>11</sup> O ba folo togo ye ko Pison; ale be woyo ka teme Havila jamana bee konɔ. Sanin be o jamana le ra. <sup>12</sup> A sanin ye sanin yereworo le ye. Turu kasa diman do fana be soro yi, min togo ye ko bideliyomu, ani lulu bisigi do, min togo ye ko onikisi. <sup>13</sup> Ba flanan togo ye ko Giyon;

ale be woyo ka teme Kusi jamana bee kono. <sup>14</sup> Ba sabanan togo ye ko Tigiri. Ale be woyo Asiri jamana tereboyanfan fe. Ba naaninan togo le ye ko Efirati.

<sup>15</sup> Ayiwa Matigi Ala ka mogo bla Edeni yiritu nyuman kono, ko a ye a sene, ka a korosi. <sup>16</sup> Ala ka nin kuma fo mogo ye ko: «I be se ka yiritu yiridenw bee do domu. <sup>17</sup> Nka yiri min be a to mogo be konyuman ni kojugu lon k'a bo nyogon na, i kana o yiriden domu de! Sabu ni i k'a do domu lon o lon, sigiya te a ra, i bena ke fen sata le ye.»

### *Ala ka muso dan cogo min na*

<sup>18</sup> Ayiwa, o ko, Matigi Ala ko: «Ce ye to a kelen na yan ten, o man nyi. Ne bena demebaga ke a ye, min be ben a ma.» <sup>19</sup> Matigi Ala tun ka bogo ta ka kongosogow bee lalaga, ani konow. O ko, a tun ka o bee lana ce fe, k'a fle a bena togo min la o bee kelen kelen na, ani janko ni ce ka na togo min la fennymanan min na, o le ye ke a togo ye. <sup>20</sup> Ce tun ka togola beganw bee ra, ani konow, ani kongosogow bee. Nka o fenw bee ce ma, a tun ma demebaga soro a yere ra, min tun be se ka ben a ma.

<sup>21</sup> Ayiwa Matigi Ala ka sunogo ba bla ce ra. Ka ce to sunogo ra, a ka a garaga koro kelen bo, ka sogobu ke ka o no datugu. <sup>22</sup> O garaga koro min bora ce ra, Matigi Ala ka o le ta k'a ke muso ye, ka na ni o muso ye ce fe. <sup>23</sup> Kabini ce ka muso ye, a ko: «Onhon! Sisan koni, nin ye ne nyogon do yere le ye. A korow ye ne korow do le ye, a farisogo fana ye ne farisogo do le ye. A togo bena la ko muso, sabu a bora ce le ra.<sup>1</sup>

<sup>24</sup> O le koson ce be bo a face ni a bamuso koro ka to ni a muso ye; o fla be jen ka ke mogo kelen ye.

<sup>1</sup> <sup>v23</sup> Heburukan na, ce ni muso togo bora nyogon fe kosebe. O b'a fo ce ma ko «Ish», ka a fo muso ma ko «Ishsha», k'a yira ko muso bora ce ra.

*Ce ni muso ka yiriden domu*

**3** <sup>1</sup> Ayiwa Matigi Ala tun ka kongosogo minw bee dan, sa le tun ka cegu ni o bee ye. Lon do sa nana a fo muso ye ko: «Yala can lo ko Ala ko, ko aw kana yiritu yiriden si domu wa?» <sup>2</sup> Muso ko: «An be se ka yiritu yiridenw domu ke. <sup>3</sup> Nka yiri min be yiritu cemance ra, Ala ko an kana o le den domu, ko hali an kana maga a ra; ko, ni o te, an bena sa.» <sup>4</sup> Sa ko muso ma ko: «Can te, aw tena sa. <sup>5</sup> Ala ka o fo sabu a k'a lon ko ni aw ka yiri nin den domu lon o lon, aw nyaw be yele, aw be ke i n'a fo ale Ala; aw bena konyuman lon k'a bo kojugu ra.»

<sup>6</sup> A! Muso k'a ye ko can ra yiri nin den ka kan ka diya; ni i k'a fle a ce ka nyi, a fana be se ka mogo hakiri yele ka i ke kolonbaga ye. Muso ka do tige k'a domu. A ce tun lonin be a koro; a ka do di ale ma, ale fana k'a domu. <sup>7</sup> O k'a domu minke, o ka o yere cogo ye. O k'a ye ko o lakolon lo. O ka toro flaburu dow siri siri nyogon na, ka o don o yere ra.

*Ala ka ce ni muso, ni sa danga*

<sup>8</sup> Ayiwa wuladanin fe, ce ni muso ka Matigi Ala mankan men, a be yaala yaalara yiritu ra. O borira ka taga dogo Matigi Ala nya yiritu yiri dow ce ma.

<sup>9</sup> Matigi Ala ka ce wele ko: «Adama, i be min?» <sup>10</sup> Ce ka Ala jaabi ko: «Ne ka i mankan men yiritu ra, ne siranna sabu ne fari lakolon lo; o koson ne dogora.» <sup>11</sup> Matigi Ala ko: «Jon le k'a fo i ye ko i fari lakolon lo? Ne tun ko aw kana yiri min den domu, koni i ma o le domu de?» <sup>12</sup> Ce ko: «I ka muso min bla ne koro, ale le ka do di ne ma, ne k'a domu.»

<sup>13</sup> Matigi Ala ka muso nyininka ko: «Mun na ele ka o ke?» Muso ko: «Sa le ka ne nege, k'a to ne k'a domu.»

<sup>14</sup> Matigi Ala k'a fo sa ye ko:

«I n'a fo ele sonna ka o ke,

ne bena i danga beganw ani kongosogo tow bee ce ra.

Sisan i bena ke fofa ye i konobara le kan,  
 buguri be to ka don i da ra,  
 i be a domu, fo ka taga i sa.

15 Ne bena juguya bla ele ni muso ce,  
 ka o juguya kelen bla i ta duruja ni muso ta duruja ce.  
 Ni o ka i soro, o be i kun ci;  
 ni ele fana ka o soro, i be o kin o senju ra.»

16 Ala k'a fo muso ye ko:

«Ne bena do fara i ta denworo sege kan.

I bena toro ka soro ka den woro.

Ka fara o kan, i ta ce logo bena to ka ke i ra;

i ta ko bee bena to ale le boro fana.»

17 Ala k'a fo ce ye ko:

«I sonna ka i ta muso kan le men,

ani ne tun kumana i fe k'a fo i ye

ko i kana yiri min den domu, i ka o domu;

ayiwa dugukolo bena danga ele koson.

I bena sege le kosebe

ka soro ka i ta baro soro k'a bo dugukolo ra,

fo ka taga i sa;

18 naniw ni binjugu dow bena falen dugukolo kan;  
 i bena fen minw sene, o le bena ke i ta baro ye.

19 I bena baara ke ka wosi le,

ka soro ka i ta baro soro,

fo ka taga i kosegi dugukolo ra yi tuun,

i danna ni o dugukolo kelen min bogo ye;

sabu i ye bogo le ye,

i fana bena seko ka ke o bogo kelen le ye.

***Ala ka Adama ni Awa gben ka bo yiritu ra***

<sup>20</sup> Ayiwa o kow ko, Adama<sup>2</sup> ka a ta muso togola ko Awa, sabu ale le kera mogo bee bamuso ye. <sup>21</sup> Matigi Ala ka began dow gbolow ke fani ye, ka o don Adama ni a ta muso ra.

<sup>22</sup> Matigi Ala ko: «Sisan mogo kera i n'a fo an do, a be konyuman ni kojugu lon k'a bo nyogon na. An ye a bari a kana nyanamanya yiriden do tige k'a domu; ni o te, ni a ka o domu a nyanaman be to wagati bee.»

<sup>23</sup> A kera ten, Matigi Ala ka o gben ka bo Edeni jamana yiritu ra, ko o ye taga dugukolo sene, Ala ka o dan ni dugukolo min bogo ye.

<sup>24</sup> Ayiwa Ala ka Adama ni Awa gben o cogo le ra. A ka meleke dow bla yiritu donda ra tereboyanfan na, k'a korosi, ani famuru do min be manamana i ko tsuma, ka yelema yelema, janko mogo si kana sira soro ka se nyanamanya yiri ma.

Burkina Faso

Jula

Gn

1996

Goerling/Groff

[AITB]

Ferkessedougou

Cote d'Ivoire

B211231